

明  
詩  
紀  
事

明詩紀事卷十八

貴陽陳田輯

田鑑

王蒙 五首

蒙字叔明吳興人元末官理問洪武初爲泰安知州

坐胡黨死

王達聽雨樓諸賢記王蒙字叔明號黃鶴山樵趙松雪之外孫也素好畫得外氏法然不求妍於時惟假筆意以寓其天機之妙爲文章不尙矩度頃刻數千言可就

都穆談纂王叔明洪武初爲泰安知州泰安廳事後有樓三間正對泰山叔明畫泰山之勝張絹素於壁每與至輒一舉筆凡三年而畫成傅色都了時陳惟允爲濟南經歷與叔明皆妙於畫且相契厚一日胥會值大雪山景愈妙叔明謂惟允曰改此畫爲雪景可乎惟允曰如傅色何叔明曰我姑試之以筆塗粉

色殊不活惟允沈思良久曰我得之矣爲小弓夾粉  
筆張滿彈之粉落絹上儼若飛舞之勢皆相顧以爲  
神奇叔明就題其上曰岱宗密雪圖自誇以爲無一  
俗筆後惟允固欲得之叔明因輟以贈陳氏寶此圖  
百年非賞鑒家不出松江張學政廷采好奇之士亦  
善丹青間陳氏蓄是圖往觀之卧其下兩日不去以  
爲斯世不復有是筆也徐武功尤愛之嘗謂客曰予  
昔親登泰山是以知斯圖之妙諸君未嘗登其妙處  
不盡知也後以三十千歸嘉興姚御史公綬未幾姚  
氏火作此畫亦付煨燼惜哉  
王世貞奔州山人四部稿黃鶴山樵王叔明爲錢塘  
崔彥暉作雲林小隱圖叔明所長在重巖複嶂根丹  
栗黃宏麗之致耳而此圖則清遠滄鬱大有北苑襄  
陽妙致似小未盡問之王百穀云猶及見全本蓋少  
圖後意爲裝師截去耳題署者僧源手譚叔明既手  
有洩瀾爲林詞而同時爲辭賦記序詩歌者凡廿七  
書所撰雲林詞而所知僅山陰王裕金華蘇伯衡始  
人多佳士而余所同知僅山陰王裕金華蘇伯衡始  
徐一夔嘉興鮑恂桐廬俞和臨安錢宰會稽唐愚士  
而已沈道潛戲謂余惜不及文待詔生當一爲攷  
以報蓋待詔最能詳勝國先朝士大夫始末故也  
六視齋筆記王叔明倣董北苑風雨蕭寺圖氣韻掀

錢物象俱備不知較北苑所作相去幾何顧叔明自  
是寫圖手遠近位置然不為山林煙靄之所汨沒  
余又見其為陶宗儀寫南村圖鳧鴨犬紡車各極  
家人器具一一畢備若子久渾厚雲林疏簡雖各極  
所擅而施之以圖似終遜黃鶴矣雲間沈良者題曰  
墨雲擁高山頃刻風雨至劃然海潮聲草木爭偃地  
曠野少人行山僧獨歸去衲衣盡沾溼敲戶何急事  
倉皇前村民乘屋一何亟一婢已抱甕一婦更持器  
重茅惜被捲破屋家所寄戴笠者漁郎理網屈雙臂  
老翁若望家擔物終不棄陸走尙甚危水行可無畏  
前溪風雨惡篙折水流駛行者當早歸居者不豫備  
北苑為此圖黃鶴師其意想見晚來晴雲淨山橫翠  
始信雲時間真宰時相戲子家有董北苑風雨蕭寺  
圖是思陵所題筆法高古精絕叔明相訪出以示之  
稱賞不置予觀以贈之叔明為臨此卷予展賞題此  
俚言時至正庚寅秋七夕次日也華溪沈良俞焯題  
云耶孃屋破葺茅茨風雨谿山樹欲飛出世不知休  
歇去縑耶何事始知歸俞焯題於都城寓舍張遠題  
云吾師一峯道人曾有模董源風雨蕭寺圖今見此  
可謂雙劍神物須合子中其藏之以俟雲間張遠竹  
懶曰余憾不得見一峯作合參兩家筆法  
張丑清河書畫舫王叔明小畫一幀首題嚴居高士

次題黃鶴山人王蒙為雅宜山中陳惟寅畫筆法秀  
雅和調斷所不能以成斯圖益知名下無虛士觀此  
手跡殊覺偽者甚可笑也同時倪鄭二公各有詩題  
真跡幼與邱壑未忘情萬疊青山照眼明擬向畫圖  
額云佳一檐電日聽松聲遂昌尚左生筆精墨妙王  
深處住懷卧遊宗少文叔明題選體一首斷續不  
右軍澄懷卧遊宗少文叔明題選體一首斷續不  
無此君倪瓚其後叔明自題選體一首斷續不  
句惜無王集參補附此今圖尚藏陳公雲初處第恨  
紙弊墨殘粗存梗概正猶隔霧看花惟想像神妙耳  
信乎畫法之工也  
張丑真蹟目錄黃王合作小幅僕暇日為郡曹劉彥  
敬畫竹趣園甫畢而一峯黃處士見過僕出此求印  
正處士以為可為添一遠山并樵逕天趣過殊頓增  
深峻矣時省郎耿君督兵華亭索僕畫甚急思拙筆  
弱頃刻不就固輟此奉獻吳興王蒙敬題叔明公子  
文敏公之外孫也天姿神品其於翰墨深入晉漢至  
於鑒裁尤所精詣鵬波之宅相非予而誰耶至正壬  
辰冬口口口口人公望拜口  
田按元季四家惟倪王明初尚存董宗伯云叔明畫  
從趙文敏風韻中來故酷似其舅又汎濫唐宋名家  
而以董源王維為宗故其縱逸多姿又往往出文敏

規格外若使叔明專門師文敏未必不為文敏所掩也可謂名論叔明畫有題名王子蒙者是其早歲所作叔明一作叔銘又號香光居士余嘗見其山嵐海卷即署斯號叔明詩無專集可採多據墨蹟錄入畫家贗託者多矣余所錄皆據明以來賞鑒家著錄流傳有緒者庶足存其真耳

姑蘇懷古 三首錄一

崔嵬靈巖山突兀姑蘇臺具區若明鏡曾照西子來玉容今寂寞蒼海飛塵埃

錢塘懷古 三首錄一

煙草埋鴻鐘劫灰隱金闕玉殿空明月春潮去不還十二白玉關當年有誰攀

田按姑蘇錢塘懷古詩各三首乃陳惟寅首倡和者七人饒介倪瓚陳秀民余詮潘收叔明與惟寅弟汝言也墨蹟流傳後數十年吳鮑菴沈石田呂秉之復追和王濟之顧華玉有跋語文徵仲彭叔明此詩刻

入停雲館帖真蹟 國初藏安儀周家

題鐵網珊瑚圖

鐵網網得珊瑚枝寄與東吳范高士翠鳳飛來毛羽寒石化  
青羊叱不起金鼎夜煉天地根閉門不識桃花春吳煙拂草  
瀛洲綠鳥嗟花落空愁人百壺美酒恣傾倒銷盡春愁人不  
老卻從鶴背看塵寰四海如杯盞華小

安 墨緣彙觀王蒙竹樹水石圖綠絲界闌水墨蒼  
筠數竿枯樹二株下作波石流泉自題詩云詩後  
范立胡儼和韻綠絲闌外上下左右有顧祿王彥文  
李仁王士顯沈瑜張禮和韻皆書法精工下又顧祿  
范立重和顧祿書于闌內此圖因詩有鐵網網得  
珊瑚枝之句故世呼為鐵網珊瑚圖如倪迂優鉢曇  
花之稱  
田按此圖會著錄郁逢慶續書畫題跋記題作鐵網  
珊瑚圖今仍其舊題

范寬畫卷山水

范寬墨法似營邱散落人間二百秋  
咫尺畫圖千里思  
山青水碧不勝愁

惠麓小隱圖

白頭學種邵平瓜  
四百年前故將家  
第一泉頭春夢醒  
洞庭煙水接天涯

陳汝言 五首

汝言字惟允  
吳人明初官濟南  
經歷坐法死  
有秋水

軒橐

六硯齋三筆  
陳惟寅惟允兄弟  
蘇門高士繪法  
宗唐宋傳朱著  
色有李思訓李營邱標致  
畫史會要  
陳惟允能詩  
文山水宗趙魏  
公清潤可愛  
兄惟寅高士有雅宜  
山居亦善山水  
寅號大髯允號



小尊

日言系書卷一

四

無聲詩史陳惟允當國初為潘左丞客有壽左丞仙  
山樓閣圖此畫之精絕者徐幼文題其山居圖云昔  
年為客處看圖懷故山今日還山住儼然圖畫間泉  
來澗蘭徑月出對花關應知農事畢高坐有餘閒  
尤鐘清賢紀陳惟允工為詩歌而園棋鼓琴無一不  
造其妙與倪元鎮為契友故有覓句仍工畫看山不  
愛名棋枰消永月琴調寄閒情之贈  
墨緣策觀陳汝言百丈泉圖筆墨高古無一不規法  
董巨相傳松江王氏藏北苑谿山行旅圖有江南半  
幅董元之稱太倉王氏有巨然潞暑山行圖董文敏  
題為北苑此二圖皆江南名畫余見石谷臨本思慕  
有年不能一見真蹟今觀此圖筆法與石谷所摹二  
圖相彷彿為元人中超軼者當作董巨觀  
田按惟允淮張時用事牧齋云惟允嘗騎馬過吳市  
遇王止仲徒行不為下以手招之曰王止仲可來我  
家看畫止仲尾之往弗敢後其矜仇專已如此余考  
文徵仲溪山秋霽圖跋云惟允貴顯時止仲為門下  
客惟允卒後其子繼從止仲學故其辭稍距惟允壻  
劉政見之罵曰此吾外父食客那得稱吾友以筆抹  
之今抹筆隱然猶存則牧齋之言信矣惟允與王叔  
明為素交合作泰山密雪圖為畫苑佳話惜畫今不

傳嘗見戴醇士侍郎畫冊跋云叔明泰山圖絕蹟以  
意想像爲之其畫空靈駘宕侍郎真一代畫家也惟  
允詩少局邊幅不能如其人之豪宕七律意格靈變  
殊有別趣西市之日索筆作畫從容就刑事詳張來  
儀詩後

### 題春山圖

春雨日霏霏春林笋蕨肥魚驚花下艇犬吠柳間扉溪水濃  
如酒山雲白似衣悠然玩清景慮淡已忘機

### 題溪山圖

峯巒青翠高千丈織女機絲手可攀萬壑雲生春冉冉一溪  
花落水斑斑人行樵徑蒼蘿裏犬吠誰家綠樹間今日看圖  
懷舊隱石田茅屋幾時還

### 九日

客逢佳節每堪嗟，忽遇君來共憶家。  
醉裏他鄉今日酒，眼中離菊去年花。  
解吟一老頭如雪，學舞雙童臉似霞。  
更憶明年會何處，不知誰復在天涯。

睡起

匡床午夢鶴驚破，簾外柳花飛白雲。  
漠漠茶煙當戶起，丁丁樵響隔林聞。  
詩成自刻庭前竹，酒熟還羹澗底芹。  
春盡江南新漲綠，扁舟何處狎鷗羣。

贈倪雲林

高齋閑寂傍湖渚，他僻林幽來者稀。  
綠陰當戶子規叫，草色滿簾蝴蝶飛。  
古人久得棲遁趣，過客暫息風塵機。  
春來水深可把釣，况有苔石臨柴扉。

王冕 十四首

冕字元章一字元肅諸暨人明初授諮議參軍未幾

卒有竹齋集三卷

四庫總目王冕天才縱逸其詩多排異道勁之氣不可拘以常格然高視闊步落落獨行無楊維禎等詭俊

纖仄之習在元明之間要為作者

朱濂學士集元章當天大雪赤足上潛嶽峯四顧大

呼曰遍天地間皆白玉合成使人心中爽去買舟下東吳渡大

去及入城戴大帽如篲穿曳地袍翩翩行兩秋軒翥

譁笑溢市中應進士舉不中棄去買舟下東吳渡大

江入淮楚應覽名山川或遇奇才俠客呼酒共飲慷

慨悲吟人斥為狂奴北遊燕都館秘書卿泰不花家

欲薦以館職元章曰公誠愚人不滿十年此中狐兔

遊矣何以祿仕為即日南轅既歸越復大言天下將

亂時海內無事或斥為妄元章曰妄人非我誰當為

妄哉攜妻孥隱九里山種豆三畝粟倍之樹梅花千

桃杏居其半芋一區薤韭各百本引水為池種魚千

餘頭結茅廬三間自題為梅花屋嘗傲周禮著書一

卷曰吾未即死持此以遇明主伊呂事業不難致也

當風日佳時操觚賦詩千百不休鵬鸞海怒讀者毛  
髮爲聳善畫梅不減楊補之求者肩背相望以繪幅  
短長爲得米之差未幾汝穎兵起一如元章言皇  
帝取婺州將攻越物色得元章投諸議參軍一夕病  
死元章狀貌魁偉美鬚髯落有大志不得少試以  
死君子惜之  
劉基文成集原章詩直而不絞質而不俚豪而不誕  
奇而不怪博而不濫有忠君愛民之情去惡拔邪之  
志悲愁惻惻見於詞意之表非徒作也  
耶璘七修類藪王冕字元章號山農身長多髯少明  
經不偶卽焚書讀古兵法戴高帽披綠蓑著長齒屐  
擊木劍行歌於市人以爲狂士之負材氣者爭與之  
遊嘗遊京城名貴側目平生嗜畫梅畫成未嘗無詩  
也有詩云我家洗硯池頭樹箇箇花開淡墨痕不要  
人誇好顏色只留清氣滿乾坤或以是詩刺時欲執  
之一夕遁後太祖物色得冕因與櫛飯蔬羹山農且  
談且食上喜曰可與共大事授諸議參軍一夕暴卒  
應制作絕云獵獵北風吹倒人乾坤無處不生塵胡  
兒凍死長城下始信江南別有春今竹齋集中未刻  
昨見蒲菴禪師復見心題其梅花一歌亦奇特也因  
舉其槩同錄歌云會稽王冕高顙愛梅自號梅花  
仙豪來寫徧羅浮雪千樹脫巾大叫成花顙有時百

金開買東山屐有時一壺獨酌西湖船暮校梅花譜  
朝誦梅花篇水邊籬落見孤韻恍然悟得華光禪我  
昔識公蓬萊古城下卧雲閣秋瀟灑短衣迎客烟  
梳頭只把梅花索高價不數楊補之每評湯叔雅筆  
精妙奪造化神坐使良工盡驚詫平生放浪禮法疏  
開口每欲談孫吳一時騎牛入燕市曠目怪殺黃髯  
胡地愛公梅花公已死留得清名傳畫史南宮侍  
石腸愛公梅花公已死留得清名傳畫史南宮侍  
度禹陵風影落鏡湖水開圖看花良可吁咸平樹老  
無遺林詩魂有些招不返高風誰起孤山逋  
國雅王參軍元章才膽思新善繪梅竹得意處輒題  
往往奇拔尤長於七言如雲合紫駝開虎頭城千峯  
草入龍沙海氣或生山背雨江湖不到石頭城千峯  
同影陷落日萬壑欲盡松風聲抽思雖奇摘詞未秀  
詩數王元章世但知其梅王孟端世但知其竹前哲  
以藝爲諱良不虛也  
支允堅梅花渡異林勝國王元章豪俠士也其詞語  
跌宕不羈可想見其爲人如五更驟雨隨風過滿眼  
落花如雪飛可愛華山陳處士風流文采卻貪眠桓  
溫豈解知王猛徐庶從來識孔明野蒿得雨長過樹  
海燕隔花輕笑人可喜一湖楊柳色不禁三月杜鵑  
聲青苔蝕盡床頭劍白日消磨鏡裏霜皆爲時事而

發至花落不隨流水去鶴飛長帶白雲來獨鶴遠從  
天際下老夫如在畫中行秋風遶屋樹聲雜夜雨落  
山溪水多萬里山河秋杳杳一天風雨夜蕭蕭亦佳  
句不可沒也

顧嗣立元詩選元章嘗遊燕都工於畫梅以臘脂作  
沒骨體燕京貴人爭求畫乃以一幅張壁間題詩其  
上曰疏花箇箇幽冰玉羌笛吹他不下來或以爲刺  
時欲執之覓覺亟歸隱於會稽之九里山自號煮石  
山農

汪日起潤亭漫鈔至元中楊璉真伽恢復佛寺三十  
餘所時棄道爲僧者七八百人皆挂冠於上永福寺  
帝師殿梁間飛來峯石壁皆鐫佛像會稽王元章疑  
詩云白石皆成佛蒼頭半是僧

田按顧俠君據朱竹垞所作元章傳云元章爲元逸  
民未嘗一日參軍事且引徐顯稗史集傳爲證錄入  
元詩四庫提要云明太祖下婺州聞冕名物色得  
之授諮議參軍未幾卒宋濂爲作傳載潛溪集中敘  
其始末甚備舊本題爲元人非其實矣余謂稗史傳  
聞異辭提要據宋景濂傳以爲信識卓矣元章詩雄  
快豪宕七古尤爲獨絕稱其爲人

關河雪霽圖爲金陵王與道題

飛沙掃人風墮幘老夫倦作關河客歸來松下結草廬卧聽  
寒流雪山白悠悠如此四十年世情脫略忘閒關今晨見晝  
忽自省平地咫尺行山川鳥道連雲出天險玉樹瓊林光閃  
閃陰崖絕壑望欲迷冰花厯落風淒慘枯槎側倒銀河開三  
巴春色隨人來漁翁舟子相笑語不覺已過洪濤堆溪回浦  
漱石齒齒溪上人家成草市長林大谷猿鳥稀小步蹇驢如  
凍蟻西望太白日色寒青山削出蛾眉山人生適意隨所寓  
底須厯涉窮躋攀明朝攬鏡成白首春色又歸江上柳何如  
高堂掛此圖浩歌且醉金陵酒

金陵行送余局官

李白題詩舊遊處桃花楊柳春無數六代衣冠委草萊千官



事業隨煙霧大江西下秦淮流石頭寂寞園荒邱原田每每  
盡禾黍青山不掩諸公墓高樓如天酒如海觸景令人生感  
慨紅墜香愁燕子飛風流王謝今安在我欲去尋朱雀橋潞  
煙落日風蕭蕭交疏結綺杳無跡但見野草生新苗小兒紛  
紛競豪縱區區割據成何用芙蓉水冷燕支消千古繁華同  
一夢傷今弔古如之何頭上歲月空蹉跎君行處有絲五純  
宦情不似詩情多江南故事可知否白雲幾幾變蒼狗休論  
平生錦機手浩歌且醉金陵酒

雪麓漁舟圖

大山小山無寸青長江萬里如月明楚天不盡鳥飛絕老樹  
欲動風無聲何人方舟順流下草衣簪笠俱瀟灑蓬底有兒

能讀書不是尋常釣魚者立貞子陶朱翁避世逃名俱已矣  
後來空自談高風我視功名等塵垢何似忘言附杯酒武陵  
豈必皆神仙桃花流水人間有

寄太素高士

我昔扁舟上邪溪尋君直過丹田西長松月冷嘯子規春風  
滿地芳草齊樓殿玲瓏金碧湧鐘聲不出松雲重老猿掬礪  
山影亂翠禽啄露巖花動此時相見不作難握手笑上松花  
壇壇下十萬青琅玕空陰漠漠常風寒我對青山論今古青  
山茫茫無一語知其與我忘爾汝石瓢酌我雲根乳冷然使  
我肝膽清飄裾欲渡浮雲輕千峯同影陷落日萬壑欲盡松  
風聲回首溪山忽成別幾見江梅飛白雪洞庭湖上聽夜雨

仲宣樓頭望明月  
熒熒對景傷古情  
寸心欲吐書難憑  
何當相晤一抵掌  
與君細看真蘭亭

柯博士畫竹

湖州老文久已矣  
近來墨竹誇二李  
紛紛後學爭奪真  
畫竹豈能知竹意  
奎章學士丹邱生  
力能與文相抗衡  
長緘大楮縱揮掃  
高堂六月驚秋聲  
人傳學士手有竹  
我知學士琅玕腹  
去年長歌下溪谷  
見我忘形笑淇澳  
我爲愛竹足不開  
十年走徧江南山  
今日披圖看新畫  
乃知愛竹亦如我  
何當置我於其下  
竹冠草衣相對坐  
坐嘯清風過長夏

吹簫出峽圖

巔崖峭絕撐碧空  
倒掛老松如老龍  
奔流落峽噴白雪  
石角

險過百丈洪我昔放舟從此出牽拖失勢氣欲折春風回首  
三十年至今認得山頭月草堂清晨看圖畫畫裏之人閒似  
我波濤洶湧都不知橫簫自向船中坐酒壺茶具船上頭江  
山滿眼隨處游安得更喚元丹邱相携共上黃鶴樓

### 猛虎行

去年江北多飛蚤今年江南多猛虎白日咆哮作隊行人家  
不敢開門戶長林大谷風颼颼四郊食盡畊田牛殘膏賸骨  
委邱壑觸骸嘯雨無人收老烏銜腸上枯樹仰天烏烏爲誰  
訴逋逃茫茫不見歸歸來又苦無家住老翁老婦相對哭布  
被多年不成幅天明起火無粒粟那更打門苛政酷折懼販  
肘無全民我欲具陳難具陳縱使移家向屬市破甕猥狗喧

成羣

有感

江南古客無寸田半尺破研輪租錢好山好水難資緣荃房  
日薄蒙荒煙囊中科斗二百年大經大法垂幽玄他人不知  
我自憐落花春暮嗁杜鵑杜鵑嗁苦山竹裂錦官宮殿煙霏  
滅人間百鳥無處栖青蠅貝錦成行列北望茫茫莎草黃  
河五月天雨霜岐陽不見真鳳凰山雞野鷺爭文章江南估  
客苦無計卻向水中擣薛荔沙漚夢老蘋雨殘溼雲不動天  
如醉回觀蓬萊十二樓我會讀讐樓上頭樓前平碧千頃秋  
白露暗洗芙蓉愁歲寒歸來有誰在青松是兄梅是弟山中  
巢許不可尋卻對老嵇餐石髓

題申屠子迪篆刻卷

我昔聞諸太古初，馮翊官宦安可摹。自從庖羲得龍馬，奇偶變化滋圖書。結繩之政由此毀，科斗鳥跡紛紜起。後來大小二篆生，周稱史籀秦誇李。只今相去幾百年，字體散漫隨雲煙。岐陽石鼓土花蝕，嶧山之碑野火然。縱有秦銘刻岑石，冰消雪剝無蹤跡。書生好學何所窺，每展史編空歎息。樊山先生東魯儒，好古博雅耽成癮。八分小篆純古法，鑿石置之東南隅。白日光芒爭照耀，滿城走看嗟神妙。向來傳寫何足珍，聚木空遺後人誚。徐公手摹烽火塵，金陵近刻殊失真。那知此本意態，丞相李斯下筆新。申屠墨莊有傳授，法度森嚴非苟苟。豈爲後學得所師，萬世千秋垂不朽。

田按子迪名駒東平人御史致遠子子迪爲紹興理  
官問交於王止善良止善曰吾里人有王元章志行  
不求於俗欲與話非就見不可子迪至卽遣吏以自  
通元章曰我不識中屠公謝不與見子迪奇其爲人  
進謁禮益恭且白於大尹朱子章具書幣製冠服俱  
造其廬以請元章爲之強起入學舍講授元章此詩  
所謂篆刻卷者子迪重刻嶧山秦碑二石置於紹興  
學官今世所謂申屠本也又詩所謂申屠墨莊有傳  
授致遠嘗聚書萬卷名曰墨莊見元史本傳

### 寫懷

世情多曲折客况自堪憐聽雨愁如海懷人夜似年草肥燕  
地馬花老蜀山鵲冷澹無歸計蒼苔滿石田

### 偶成

二月江亭野色明揚花飛散雪盈盈鹽煙半入海氣白風雨  
忽來谿樹鳴離思厭聽孤燕語客情無奈亂山青明朝又上

長安道卻望咸陽舊帝京

過昭瑞宮次韻

金屋無人玉殿開  
青蒲埋沒遍莓苔  
舊愁隱隱隨煙浪  
新恨綿綿入草萊  
紅葉已隨流水去  
黃門空憶看花來  
東南富貴消磨盡  
留得荒邨古將臺

吳鄉

東山西山生白雲  
吳鄉那忍見殘春  
野蒿得雨長過樹  
海燕隔花輕笑人  
每是閉門疎世事  
何曾借酒惱比鄰  
過從時有相嗔怪  
不解潛夫意思真

金水河春興

金水河邊柳色新  
玉山館外少沙塵  
琵琶未必能愁客  
鸚鵡



如何錯喚人翠袖錦襜馱白馬落花飛絮闕朱輪人間天上  
無多路只隔紅門別是春

張紳十一首

紳字仲紳一字士行登州人洪武十五年以薦授鄆

縣教諭尋召爲右僉都御史終浙江布政使

聽雨樓諸賢記張紳字仲紳濟南人慷慨激烈不瑣  
瑣於世事作爲詩文雖不經意而自成一家能議論  
終日晝晝不休蓋北方豪傑之士爲本朝浙江布政  
書史會要張紳字士行山東人負才畧談辯縱橫能  
作篆書

卞永譽式古堂書史張紳善篆書亦善寫墨竹  
田按列朝詩集詩綜均以仲紳爲濟南人蓋陳王達  
善聽雨樓諸賢記也考實錄十五年齊魯鮑余詮張紳  
人被徵至京先是禮部主事劉庸舉鮑余詮張紳  
張長年皆明經老儒達於治體可備顧問遣使舉召  
之恤詮長年先至命爲文華殿大學士以老疾辭放  
歸紳後至授陝西鄆縣教諭紳登州人以學行稱明

史四庫總目均以紳爲登州人今據此改正明初山東以詩文名家者仲紳牛士良外指不多屈宋弼輯山左明詩洪武間寥寥數人當時豈無作者無好事者表章之耳仲紳兼善書畫高季迪題張雲門畫竹詩云臨池書罷換鸞文餘墨猶堪寫此君一段湘娥廟前意淋漓秋雨共秋雲朱竹垞云仲紳精於賞鑒自稱雲門山樵雲門遺老此外尚有山門老樵雲山人皆仲紳別號亦書畫家所當知也

### 題畫

閉門綠樹老華池芳草生偶隨蝴蝶起獨自下階行何處垂

楊院春風嬌鳥鳴

### 題江岫圖

烏衣巷裏東風老蝴蝶飛來滿芳草美人春夢隔天涯十二巫山眉不掃巫山巫峽江水新煙波渺渺江南春鴛鴦不識橫塘路鸚鵡窗前呼向人青綾誰共官曹宿霜楮雲毫吮新

綠太常春夢碧霞沈六曲屏風對銀燭

高陵篇

有序

盧君公武所著孫王墓辨考據詳審與蔡正甫燕王墓辨同繼又作詩弔古合古今詩文及和之者敘次辨後成一編以示予可謂好古也矣余雅好論辨古今同賦詩一首

道旁鬼鏃飛神叢狂客賊我人中龍有兒十七心膽雄意氣奄有江之東臍然未息炎精委四海英雄爲時起十年血戰不成功破面安能作天子盤盤門外野水濱可憐高冢埋麒麟髑髏飲恨尙不朽死骨肯作曹瞞臣墓旁春草年年碧黃金握臂人耕出姓名幸爾人不知卻怪中平一方石君不見

吳王帳下越王舞漢王成功楚王虜英雄千載欲何爲盡作  
北邙山下土又不見秦王治葬驪山宮玉鳧金雁俱成空武  
皇求仙東海上茂陵石馬嘶秋風與君下馬高陵路落日高  
城起煙霧闕闕壞塚在城邊何須重歎孫王墓

日出行

東方曈曈日初出田家少婦當窗織屋頭樹稀窗有光小姑  
催起不暇妝長梭軋軋秋絲密一日上機催一匹丁甯小郎  
慎勿嗾織成令汝穿完衣

捕雀詞

原頭霜深秋草薄荒邨山兒捕黃雀高張弓矢低羅網日暮  
競比誰得多野田吹火拾枯樹一半煨燒雜山芋北風吹草

毛血腥各自騎牛唱歌去  
我身不惜充爾饑  
空城黃口待我歸

送友賦得玉鉤斜

在揚州揚帝葬宮人處

右屯將軍猛如虎  
十二離宮罷歌舞  
宮中佳麗三千人  
半作玉鉤斜上土  
秋風蕭蕭秋雨寒  
翠襦零落金釧殘  
豈知後來好事者  
重搆華亭宿草間  
亭前往來車馬集  
魚龍爛熳無人識  
開街屈律玉環分  
香徑縈紆寶釵出  
游人歌舞暮不歸  
青山落日爭光輝  
香魂夜夜無歸處  
化作鴛鴦陌上飛  
只今往事皆沈沒  
空見原頭土花碧  
畊夫拾得鳳凰釵  
恐是蕭娘在時物  
野棠花開春日西  
胡蝶雙飛鶯亂啼  
道傍芳草年年合  
長與行人送馬蹏

題王提舉界畫樓閣圖

吳蠶繅繅銀絲光輕毫界墨秋痕香宮中千門復萬戶知是  
阿房是未央樓頭美人朝未起十二珠簾隔秋水香銷玳瑁  
舞筵間夢斷芙蓉鴛帳底八窗玲瓏金鎖開君王已在迎仙  
臺霓旌鳳輦雲間合翠管銀笙天上來君不見咸陽一火三  
月紅野花嘯鳥爭春風當時亡國知何處盡在如今圖畫中

送勤上人歸靈鷲山

靈鷲禪房我所思可堪春晚送勤師半山嘯鳥煙霞裏一路  
落花風雨時定有猿看窗外果應知苔護壁間詩門前有徑  
通三竺欲向中天采石芝

遊冶城山

詞譜卷十八  
三  
瑤草秋深石燈長半空嵐氣溼衣裳江山佳處一亭古風雨  
來時四座涼陰洞水腥龍蛻角山巖雲暖麝生香道人好護  
新松樹長見清陰覆御床

再題聽雨樓卷

草樓聽雨夜春燈隔重簾瓶中新茗煮奩裏舊口添風珮潛  
歸浦雲玢亂綴檐乍驚來湛湛更覺去纖纖頗被風相妬還  
疑雪與兼喜隨魚艇泊愁怕客窗淹頭白盧徵士高情苦未  
厭

題雲林畫

春林無人白石香白雪飛來江上房扁舟載得吳娃去三十  
六灣春夢長

翠野一首

野字叔耕歸安人洪武初由訓導遷棗強知縣致仕  
後改麗波巡檢卒官有環洲集

六硯齋筆記華叔耕善畫梅居湖之蓮花莊  
田按張來儀題華叔耕畫梅雪軒詩云好畫誰如華  
棗強墮馬折肱猶未忘何年寫此寒林趣精絕未數  
左手王明初詩家以畫梅稱者王元章劉子高唐處  
敬叔耕畫梅詩不多見

杏林仙館圖

仙家樓閣倚崇山鐵鎖千尋不可攀獨爲尋真行海上偶因  
訪疾到人閒舟成紫室龍垂野杏熟青林虎抱關聞說著書  
有餘暇石壇步月珮珊珊

吳植一首



植字子立嚴州人以處士徵藤州知州

列朝詩集子立別自號白玉壺善草書

### 留別張孟兼

故人昔隱仙華山高卧白雲終日閑我攜清都綠玉杖相與  
嘯傲煙霞間一朝忽被徵書起姓名直入明光裏清時冠帶  
圓橋門濟濟橫經臨璧水坐擁皋比三載餘石室仍紬太史  
書平生直氣橫秋嶽秉筆一字誅奸諛邇來峻擢儀曹上千  
載皇風同掛謏要知制作魯諸生元是傳經舊劉向蹇予泉  
石是生涯白頭受薦來京華相逢共醉金陵市一官卻種河  
陽花人生離會良可惜已覺形容非昨日馬頭萬點蜀山青  
回首秦淮煙樹夕丈夫才氣古所難去去有冠冠莫彈邯鄲

酒熟甯辭飲飯顆詩成得細看  
憐君最是知予者慷慨高歌  
起中夜葛令丹砂或可求  
玉喬飛鳥還堪借他時一笑蓬萊  
嶺碧桃亂發東風前還將玉管吹明月叶似雲閒紫鳳篇

芮麟一首

麟字志文宣城人洪武中由國子生累官台州府知府謫戍邊復起爲建甯知府

過庭訓分省人物考芮麟善楷書

敬亭弔古

輕雲開雨弄春陰好鳥如歌綠樹深  
欲問山靈招李白倚樓吟斷碧雲岑

袁養福一首

養福字能伯吳人洪武初官湖廣按察副史調福建

抱翁家藏集袁養福所書郭有道碑文端勁清峭深得歐陽率更筆意以其字畫之妙如此宜有書名於時然吳人固不知有袁養福也陳檢討嗣初稱其行潔負才氣有詩聲蓋不特能書而已

寄陳厚性

漫客狂遊去不歸柳深江碧暮春時十年客夢連宵雨萬里  
山行滿篋詩南浦草多離恨遠青樓人去雁來遲何妨脫卻  
風塵吏日日街頭醉似泥

明詩紀事卷十九

貴陽陳田輯

甲繼

烏斯道五首

斯道字繼善，慈谿人。洪武初，以薦起知石龍縣。改永新坐事，謫戍定遠。尋放還，有秋吟稿、春草齋集。

四庫總目：烏斯道詩寄託深遠，吐屬清華，能剷除元人繁縟之弊。列朝詩集繼善精楷法，罷官後求詩及書者戶限常滿。

鄭梁：寒村見黃稿，春草先生善奕，工畫，精琴，楷書行草尤妙。為文章質實有體，裁詩則清新瀟灑。一洗元

人雕鏤填砌之習。

田按：繼善在明初以文名，詩亦高秀。以事謫戍定遠，放還鄭千之寄繼善詩云：誤傳海外蘇公死，終謝羌村杜老還。紀其事也。列朝詩集詩綜均云：以疾去官。

蓋未得其真矣

瀟湘水雲

英英水上雲乃在瀟湘間朝隨江風出暮逐江風還盤旋復  
縹緲遙接九疑山重瞳不可見但見江竹斑明月照洲渚於  
馬發長歎

古詩

驅車陟太行中道車輪折挽舟沂河流中流縷縻絕前途鬱  
漫漫徬徨欲懷歸積雪被長坂洪濤蕩寒暄胡不戒未然間  
中愼所之徒懷百年志自貽千里悲

題扇頭山水贈股本初

海上神仙窟分明入畫圖山雲連太白溪水落東湖路覺行

邊斷亭從僻處孤直教殷處士城市迹全無

遊寶峰菴和僧穆菴韻

亂山窩裏縛茅菴路轉東溪漸向南林鳥每留閑客住野猿  
時對老僧談庖分夜雨巖前溜閣貯秋雲塢內嵐誰把新詩  
題瘦竹一枝搖動翠毵毵

關峰

春山花發雨霏霏花雨曾沾闕相衣今日山花依舊好春風  
吹雨溼僧扉

顧祿四首

祿初名天祿字謹中松江華亭人洪武初以太學生  
除太常典簿遷蜀府教授有經進集二十卷

青溪暇筆太常博士顧祿善詩歌有過番陽湖詩其一聯云放歌今日容豪客破敵當年想至尊聞入禁中太祖命盡進其作一日近臣入便殿見上所常御之處有祿詩數帙蓋深喜之也  
菲亭志顧謹中能詩善書行楷學蘇文忠公而尤工於分隸  
畫史會要顧謹中善雜畫亦能鉤勒竹石  
列朝詩集顧祿少有才名嗜酒善書高士敏贈詩有兩京詩博士一代酒神仙之語  
田按謹中詩看似汪洋大篇實則一覽易盡集中短章較工亦才限之也

和子瞻四時詞 錄一

午階初轉梧桐影玉腕清冰敲齒冷蝶夢驚同寶簾閒龍涎  
裊斷金爐靜蘭湯浴罷拖香巾粉汗都消肉色勻十二畫闌  
隨處倚晚涼天氣更宜人

春夜曲

闔闔城西百花洲漲天花氣紅雲浮飛觴未盡白日興秉燭  
更爲清夜遊筵前美人歌莫愁坐中上客醉未休明朝花落  
春易老綠樹重重嘯栗留

火後過南山禪寺

南山真勝境劫火已無遺半落殘僧少淒涼過客悲草荒行  
道地水涸放生池最憶瓊師逝無人爲論詩

題元鎮畫

往年曾訪天隨子煙樹微茫過太湖雪色寒鱸臨水買翠陰  
春鳥隔林呼只今圖畫渾相似如此家山住得無皎皎白駒  
空谷裏令人搔首憶潛夫

浦源 五首



源字長源無錫人洪武中晉府引禮舍人有舍人集

十卷

國雅浦舍人長源詞彩秀潤元美品浦林爲小乘法  
師言未到佛境界也舍人句云聽雞曉闕疏星白走  
馬春郊細柳黃衣上暮寒吳苑雨馬頭秋色晉陵山  
亦是相中色語時王學士達善王舍人孟端爲同邑  
名人學士有路分京口樹帆渡月中潮舍人有臘釀  
多藤酒春禽半竹雞並稱秀句湛李之後錫中之賢  
稍嗣中落  
明詩別裁舍人名句詩中有畫  
田按舍人非徒善詩兼長於畫趙景哲題浦舍人梧  
竹圖詩云頗懷出塵想飛思凌滄洲湘江夜來雨寒  
色川上浮程原道題浦舍人畫梧桐竹石詩云雲林  
弟子浦長源風雪相逢白下門請寫江南山水窟著  
我讀書秋樹根舍人遊閩以林子羽賞拔得詩名集  
中合作不在子羽下

送人之荆門

長江風颭布帆輕西人荆門感客情三國已亡遺舊壘幾家

猶在佳荒城雲邊路遠巴山色樹裏河流漢水聲若過旗亭  
多買醉不須弔古漫題名

筆精沛長源送人之荆門詩近見一詩話載此詩稍  
異今錄於後正馬南歸望古城半林殘雨夕陽明雲  
邊路繞巴山色樹裏河流漢水聲墮淚有神苔色古  
甘棠無樹酒旗橫那堪回首成陳迹笳鼓西風慘客  
情詩話無名氏余得之杭州僧房  
周亮工閩小紀林子羽以薦至京師應試賦龍池春  
色詩名動京師既歸家從者如雲里陵浦舍人問其  
名往見之子羽不出使弟子周玄黃玄往見之問其  
來意曰欲爲詩耳因出所作二玄讀之至雲邊路遠  
巴山色樹裏河流漢水聲驚曰此吾家詩也因白子  
羽出見之定交而去

寄袁二

長安年少羽林郎騎射翩翩侍武皇弓影醉開孤月滿刀頭  
新買百金裝聽雞曉闕疏星白走馬秋郊細柳黃應募玉門

關外去請纓生繫左賢王

送人還鄉

都門楊柳拂離筵歸路青山水國連三月春陰垂細雨幾家  
寒食起新煙聽鶯谷口停行蓋立馬江頭問渡船此去故園  
應酒熟杏花開遍草堂前

林七員外園亭夜飲得河字

都亭分袂惜蹉跎此夕相逢奈若何細雨疏燈聞落葉斷雲  
高樹見明河客踪迢遞天邊雁歸夢微茫海上波鞍馬朝來  
又成別且傾尊酒一長歌

汾上旅懷

汾水連雲起白波河梁欲渡奈愁何故鄉莫指并州是歸夢

江南夜夜多

馬琬一首

琬字文璧江甯人

一作松江人

洪武初官撫州知府有渚

園集

西湖竹枝集馬文璧自少有志節詩工古歌行尤工諸畫然皆其天姿之所出也

貝瓊清江集文璧早歲從鐵崖楊公授春秋學尤工詩與書畫每遇佳山水必托之藁素有董北苑米南宮之法輒自題其左時號三絕灌園集凡五百餘首余誦之不啻鼓空桑以破瓦缶之音進太羹元酒而撤劉豢之味信其發於天機不待雕肝琢腎之爲工也

畫史會要馬琬號魯鈍松江人山水宗董源善平遠曠闊之景

題趙仲穆竹西草亭圖

楊子宅前好修竹因看萬箇碧交加薰風滿簾吹蒼雪春雨

尤庖盡玉芽茶曰或聞來北牖籜龍未許過東家時時彷彿  
揚州去拄杖尋君又日斜

李日華紫桃軒雜綴華亭楊竹西住張堰家有不礙  
雲山樓與曹雲西顧金粟倪元鎮諸公遊吳繹寫其  
像元鎮為布樹石而諸名士題咏之余家有楊鐵崖  
書竹西記趙仲穆作圖而馬文璧諸公皆有詠蓋風  
流文雅之俠也元季士君子不樂仕而法網寬田賦  
三十稅一故野處者得以貲雄而樂其志如此  
田按楊元誠名珣竹懶六硯齋筆記云元誠氣豪而  
有清尚一時諸公皆與往還晚棲峯泖間種竹千竿  
自號竹西居士趙仲穆圖楊廉夫作記元誠自題云  
翠玉蕭蕭在屋東主人歸作竹西翁仲穆張伯雨馬  
文璧錢惟善陶宗儀皆有題咏此卷國初入高江  
村詹事家尚有金華邵夷月樓趙楠題咏楊循吉黃  
雲跋語竹懶所未紀也顧俠君云松江志載楊謙別  
號竹西讀書不仕家有不礙雲山樓楊維禎貝瓊為  
之歌詠則似乎又有一楊竹西矣豈元誠謝歸鶴沙  
時變易名號郡志或宋之考耶據此則竹懶所紀或  
有外誤姑錄於此以俟參考

史謹 二首

謹字公謹崑山人洪武初以事謫雲南後用薦爲應天府推官降補湘陰縣丞罷官僑居江甯以終有獨

醉亭集三卷

四庫總目史謹詩不涉元季縛靡之習亦不涉宋季酸腐之調平正通達而神采自然高秀在明初可自爲

一家

梅花草堂集史謹字公敏少從毘陵倪瓚郡人高啟遊博學好古工詩什善丹青讀偶武孟集得所爲與史敏結交行一篇其詞云故人故宅居斐城嗟予避地臨東溟兩鄉相去不多遠擇交已結雞豚盟適從別來三十載百粵東西隔嶺海臨風對月每思君人寰遠滾知何在行年七十餘客遊都門扶病軀莫愁家東杏林下握手一笑情何如子居巷南我巷北幾度論心話購昔輔車今日幸相依故作歌詩寫胸臆崑山志云謹字公謹誤也周暉金陵瑣事史謹太倉人流寓金陵自號吳門野樵工繪事長於寒林雪景嘗自題其畫云雨餘山色

翠如苔樹杪寒煙溼未開童子無端掃紅葉隔林知  
有故人來集中佳句七星關云路遠家難問愁多酒  
易醒西山精舍云磬戶蜂留蜜松巢鶴隨翎遊清涼  
寺云古徑依山轉清溪向晚哀攬秀樓云殘霞擁樹  
作秋色空翠襲衣生暮寒送屠先生云南浦斜陽芳  
草色東風嘯鳥落花天日晷為張布政賦云靜遞青  
春同禁柳暗移白髮上朝簪萬松軒云秋聲出樹曉  
無迹雲氣入簾風滿庭遊天界寺云地煖漸生眠鹿  
草松枯欲折挂猿枝贈吳羽士云松下翦雲縫鶴氅  
花間滴露寫鸚鵡經

### 湘江夜泊

扁舟載月下三湘露渚風來杜若香一片秋聲無處著和愁  
散入水雲鄉

### 題畫

數株煙柳綠毵毵兩岸青山起暮嵐多少天涯未歸客卻從  
畫裏看江南

薛穆二首

穆字公遠吳江人

一作吳松人

洪武中授柳州通判

書史會要薛穆字公遠號澹園洪武中爲柳州通判能詩文善楷書

畫史會要薛穆精於畫

田按公遠自號北礪生與徐良夫唱和詩多見金蘭集顧俠君錄公遠詩入元詩癸集余據朱隱之書史會要畫史會要採入

次韻兩公六絕求正良夫錄二

鳥悲花褪幾番春不覺興懷淚滿巾止酒正憐彭澤令窮吟

還憶杜陵人

長谷深村水竹幽瘦筇芒履遍追游從教山鳥嘯春去祇是

閒人不解愁

虞堪二首



堪字克用一字勝伯長洲人洪武中爲雲南府學教

授有希澹園詩三卷

四庫總目虞堪詩多題畫之作又丁元末造時有憂時感事之言古體氣格頗高近體亦音節婉惟七言律詩刻意意欲效黃庭堅而才力淺薄終不相近然大致婉約秀逸頗饒情韻無當時猥麤之習亦可謂娟娟獨立矣

南濠詩話元末吾鄉有虞堪勝伯者善作詩舊題趙子昂若溪圖云吳興公子玉堂仙寫出若溪似輞川同首青山紅樹下那無十畝種瓜田爲人膾炙近沈先生被南題子昂畫馬一絕寄予許之詩云隅目晶熒耳竹披江南北流乘黃姿千金千里無人識笑看胡兒買去騎先生又爲子誦周方伯良有題子昂竹枝云中原日暮龍旂遠南國春深水殿寒留得一枝煙雨裏又隨人去報平安三詩皆主刺識而勝伯之詞尤微婉云

續吳先賢讚虞堪者宋宰相允文後也徙家長洲家富其所藏書多雍公遺又行重購技嘗日夜不休自稱僻焉爲詩頗情潤兼好吮朱設色圖畫樹石盤礴睥睨故爲賞好所移盡費其產從祖伯生嘗愛重之

其書迺亦賴之傳  
畫史會要虞堪米丞相允文之裔山水亦思致可愛  
田按勝伯古詩痕迹未化七言斷句大有君家伯生  
風趣

贈倪元鎮

參差海樹珊瑚立  
窈窕風篁翡翠分  
尙想君家清閨閣  
臨池誰見搗鵝羣

庭前樹子轉屈鐵  
石上竹君凌古青  
得見文殊參幻相  
也應重說淨名經

楊彝三首

彝字宗彝餘姚人  
僑寓普安洪武中以人才舉爲沔  
陽倉副使遷都察院司獄調長泰主簿以獻詩擢吏  
部主事有鳳臺貴竹東屯南游諸藁

莫友芝黔詩紀略宗彝餘姚人晚居普安衛自少卓  
舉擅詩名工書畫洪武間官長泰簿子顯被誣死刑  
部獄孫志編戊普安宗彝棄官詣闕自陳以獻計提  
吏部考功司主事二十四年從駕幸華山獻攬勝賦  
稱旨明年請老乞就養孫戊所遂終焉衛東屯多松  
開萬松軒以居自號萬松老人又於衛西北結亭曰  
天風年八十乃卒高郵沈勛銘其墓曰才行兼偉身  
與名全雄詞藻翰蛟舞鳳鸞盡耄而康孰不曰詩之  
仙義我佳城觀者仰止詎云殊鄉於光萬里  
田按吾黔普安衛明初隸雲南沐景願滄海遺珠錄  
謫宦雲南及寓公詩宗彝與焉宗彝以孫志編戊普  
安就養孫所竹垞詩綜云謫居滇南非其實矣紹興  
志稱宗彝別號銀塘生乘牛出入四明洞天迺風景  
林壑之美即箕踞長嘯狀其草木水石題詩於上壘  
光動盪可謂韻士貴竹東屯二集皆寓黔吟稿也吾  
黔寓公之以風雅擅名者當以宗彝爲開先矣

碧雲洞

老夫生平愛山水每聞勝景心獨喜故人邀我城南遊出郭  
溪行二三里峯崖路轉非塵寰雞犬人家足生理恍然真我

桃源中風景依稀乃相似耕田鑿井不記年疑是秦人始居  
此谷中樹暗連桑麻澗底花香雜蘭芷陰陽古洞蒼山根絕  
壁飛岩半空倚豁然深入天窻明外狹中開如屋裏醉眠雲  
磴高似牀袖拂平沙淨於几松風一派從天來散作泉流和  
宮徵泉來直與海眼通鶴髮仙人烹石髓蛟龍窟宅變斯須  
白日陰崖電光紫此時豪興爲誰發筆下詩成泣山鬼安得  
凌空生羽翼共載吹笙玉童子一聲長嘯洞雲寒日出林梢  
鶴飛起

紫棠晚照

紫塘小雨過山椒日腳斜低轉樹腰暝色漸來青靄重晴光  
欲歛絳煙消穿雲歸去秋原牧隔水行歌晚徑樵林下旌旗

來小隊將軍回獵射雙雕

蚤起

一聲殘角數聲雞南斗高懸北斗移多少行人度關去東方  
曙色尙淒迷

邵誼一首

誼字思宜休甯人洪武中以薦授本縣訓導轉夥縣  
教諭有鉏雲集

程敏政新安文獻志思宜與兄致皆能文善繪事  
詹景鳳詹氏小辨思宜分省學受禪碑亦雅勁

題野航卷

楓葉荻花秋氣清扁舟不受波濤驚一聲棹歌日欲晚半榻  
竹影風初生幽人落落雪霄志小窗悠悠江漢情夜園酒醒

萬籟寂似向沙頭弄月明

朱應辰 一首

應辰字文奎吳人洪武初爲本府訓導改江陰有漱

芳集

畫史會要朱應辰號奇善白描人物  
列朝詩集文奎從楊繼學古文學博多伎能篆隸  
法古田按都元敬南濠詩話盛稱文奎元夕詩殊不見工  
不如照眼梅花情思好魚暄鳥雀羽毛輕一聯差可  
誦也

山中書事

支筇步履踏莓苔小院無人燕子來最是東風難管領梨花

落盡杏花開

王履 一首

履字安道號畸叟崑山人

倉人一去太

祝允明祝氏集略王崎叟學術淵邃吐露奇傑治洲  
武將軍家藏得其華山圖子凡數十段詩數百首首  
尾爛然完整發卷便如攜人到異境詩句煥發模象  
深古敘記脫邁人間世藝事有如此後者哉近世當  
有幾何許西岳雄詭精神與人蹤跡言語間相警發  
者韓公杜老潘子陳先生后乃始得叟  
績吳先賢讚王履善為詩文圖畫學夏圭使腕有餘  
力故秀勁行筆意在在前故麗密嘗遊華山為圖四十  
餘系以詩時稱合作  
弇州山人四部稿遊華山者往往至青柯坪而止至  
韓退之登其顛不能下慟哭與家訣其語問於人而  
仙掌蓮花開永絕摺紳先生之迹而僅為樵子牧豎  
所有洪武中吾州王履安道獨能以知命之歲挾策  
冒險凌絕頂探幽宅與羽人靜煉問答歸而筆之記  
若詩又能托之畫而天外三峯高奇曠與之勝遊矣  
畫冊凡四十幅絕得馬夏風格天骨迥爽書法亦純  
雅可愛安道沒歸之里人武氏而失其四後於長干  
酒肆見之宛然延津之合也傾橐金購歸為武家雅  
語

梅花草堂集王安道與孤心遠讀書無所不極心手

都靈所作詩文字畫皆成獨造無規則首尾而神脈

清激欲令千載上未有古人

列朝詩集王安道篤志問學博通羣籍能詩文工繪

事洪武十六年秋七月游華山作圖四十幅記四篇

詩一百五十首自有華山以來游而能圖而能記

記而能詩窮覽太華之勝古今一人而已安道畫少

師夏圭評者謂行筆秀勁布置茂密作家士氣咸備

及游華山見奇秀天出乃知三十年學畫不過紙絹

相承指為某家數於是屏去舊習以意匠就天則出

之有問何師曰吾師心向為名目師華山

田按安道華山圖詩記向為名目師華山

屬陸叔平摹二十許幅俞質父錄其詩與序錢牧齋  
錄其詩百餘首入列朝詩集朱竹垞始有異議謂其  
詩不足採余謂安道人奇事奇畫詩俱韻平心細閱  
為之擷其精華入山云廬山秀在外華山秀在裏蒼  
龍嶺云驚魂及墜魄往往隨風吹宿玉女峯云松林  
延幽風倏忽天樂沸入夜聞磬疑風雨大作不敢睡  
云松底踏碎月過清寒不支鐵鎖云伯梁度世無尋  
處卷取松風獨自還林中遙見白物疑是白鹿云何  
當快與劉根約白玉床前看紫雲下山近青柯坪云  
一澗破秋寂萬松嘯風王泉院云昨轉希夷洞傍山  
空細細松陰婉婉風玉泉院云昨轉希夷洞傍山雨



畫屏宿雲團喻白微峭吐寒青友人見過請談所遇  
云正御風將還白鶴忽隨雲又上蒼龍如此名句種  
種可傳恨不得見其圖一一印証之

華山西北夾路皆荷花望不知其頃之爲幾大石小石  
錯雜乎中邊詢之途人有老者云此地本山址昔因  
崩而下陷故水聚荷生

池蓮井蓮俱無徵上峯下峯空復情山崩地陷忽露形爛漫  
化作千娉婷水晶之宮秋眇冥綠娟紅膩琉璃屏俊驢健僕  
風泠泠欲行不行杳難名漢皋洛浦方合并野人解唱江南  
聲

宋騷 三首

璉字仲珩浦江人學士濂仲子洪武九年召爲中書

舍人以兄子慎連坐死

方孝孺遜志齋集近代能草書者吳興趙公子昂公所敬者爲鮮于公伯幾稍後得名者爲康里公子山繼三公而作者金華宋仲珩草書如天驥行中原一日千里超澗波險不動氣力雖若不可蹤迹而馳驟必合程矩直可凌跨鮮于康里使趙公見之必有起予之歎

何喬遠名山藏宋仲珩精篆隸真草書嘗見梁草堂法師墓篆及吳天璽中皇象書三段石刻觀之至忘寢食遂悟筆法小篆之工爲國朝第一景濂每見佳處便曰寫老夫名足可傳世矣

詩數吾婆景濂文仲珩書皆國朝第一而七言律亦盛有佳篇如承旨送張仲藻畢姻舍人題小簾洞皆精工華整國初似此有幾

田接沈景倩稱劉伯溫工於山水似李營邱李君實稱宋景濂精於細楷爲明代第一名輩遊藝之工如此舍人稟承家學書體吟才俱稱絕俗天不欲陽冰長吉並出一人迷爾中婆惜哉

采桑曲

桑芽露春微似粟小姑把蠶試新浴素翎頻埽細於蟻嫩葉  
纖纖初上指朝采桑暮采桑采桑不得盈傾筐差將辛苦向  
姑語妾命自知桑葉比家中蠶早未成眠大姑已用新絲錢  
岸上何人紫花馬卻欲拋金桑樹下

題水簾洞

石泉飛雨亂淋漓翠箔銀絲萬縷齊雲屋潤含珠網密月鉤  
涼沁玉繩低鮫人夜織嘒痕涇湘女晨粧望眼迷恍似水晶  
宮殿裏四檐花雨亂鶯囀

與耕漁子山館燕集分韻得花字

草深顏巷路迴斜何事勞君遠命車野食本難供客饌故人  
應不訝貧家先傾臘後山瓢酒更煮春先石鼎茶竹裏風生

飄細粉林間鳥去落餘花情親那問相逢晚世難休將後會  
除多少江湖同志友只今能幾卧雲霞

田按此詩見吳伯榮辛丑消夏記仲珩書寄徐良夫  
者良夫萃當時人投贈詩文爲金蘭集國初良夫  
十二世孫大樂出先世所藏詩箋百餘幅正草篆隸  
靡所不有皆元季明初諸公手蹟朱竹垞及見之未  
幾以訟破家悉爲有力者所得此詩亦其一也乾隆  
庚辰其裔孫友竹重刻金蘭集不載此詩徐氏子孫  
有好事者當援此補之

陳璧一首

璧字文東松江華亭人洪武中以秀才授解州判官

改郴州

何良俊四友齋叢說陳谷陽正書酷似歐陽率更行  
草漸逼大令篆書亦入格  
書史會要陳璧與三宋齊名用筆亦從懷素自敘帖  
中流出

田按文東一號谷陽生家有古窩楊鐵崖爲作古窩  
記稱其能談古學爲古文章書法盛有時名詩非當  
家亦能作鐵門中語

題彥皋純軒

芙蓉花冷煙雨雨鯉魚風生紫葦渚軒前秋容浩無主江人  
倚機煙中語纖莖採香花漣漣冰絲齊穿水晶綠純有羹菰  
有米絲衣捧壽阿母喜平生宦情一杯水

張辰一首

展宇翰宸嘉定人洪武初官訓導

陸深隱山集國朝書家如宋仲溫陳文東張翰宸三  
人難爲伯仲其意外之意非常人可及  
田按翰宸號草愚又號端白居士以書知名

寄許瀾伯

水泊山樓分自甘我留君去意何堪幾回雨雪三槎上强半  
鶯花五鷗南宰木空慚歸遠夢扁舟猶憶載餘酣從今莫惜  
頻相顧燈火虛齋遲夜談

盧熊 三首

熊字公武崑山人元末爲吳縣訓導洪武初以故官  
起尋告歸復起爲工部照磨改中書舍人出知兗州  
坐事死

水東日記盧熊洪武初名儒通篆籀學嘗爲兗州知  
州既視篆具奏印文亮字誤類衮上不怡幾被禍後  
卒坐累

梅花草堂集盧兗州弟熙字公暨博學好古善楷法  
洪武初以薦授睢州同知一意休息未久卒官兗州  
嘗贈之詩云盍盍清夢穩鐵石古心存人以爲不愧  
斯語

田按洪武時魯孟舉解大神以善書通顯公武與周

履道亦以書名而祿位不及祝京兆書述云詹解鳴  
於朝盧周著於野朝者乃當讓野公武嘗與沈伯熙  
訪吳桓王墓於平江盤門外沙湖墓上有木如蚪龍  
每陰雨若鬼物操舟蕩漾之狀人或逐之不見政和  
間居人伐樹掘地得金船長二尺許其怪遂息公武  
著高陵篇以弔之所謂或云金龍船光怪發靈罔登  
陟增感傷華木亦斬刈也同時作者有吳興沈毅登  
州張紳紳詩最工余已錄於前卷厥後朱凱緝為高  
陵編作者當不止此惜余未覩其備耳

次雲林韻答耕漁詩

我有邱壑趣神馳太湖秋每懷銅山陲欲放鷓夷舟伊人尚  
貞操交朋盡名流讀書無外慕下筆不自休朝耕隴上田暮  
漁水中洲期先謁毛公訪古往角頭行吟歷泉石不厭阻且  
修野樵屨相候靈藥或可求皮陸有遺跡槩尊日從遊淨沈  
翰墨間傾企才德優羣賢一枉顧晤言終日留思欲往從之

山川鬱相繆未遂箕頴志遠慕巖谷幽披文詠珠玉臨風倚  
江樓

訪耕漁先生

我懷山中人拏舟訪雲壑  
一載餘憂患亦紛錯神交迹  
自疎道重心不忤下榻埽庭除  
開尊共酬酢來禽薦芳鮮有  
兔詠燔炙林風生絺衣山月挂  
蘿壁良朋惜雲散煩襟喜冰  
鑠留連不知醉清影破幽閤  
蹇余會有役明日向城郭行止  
固難期音書諒堪託

寄朱伯盛

白首耽書更不忘鵠文蟲篆爛生光  
高人爲賦峨冠石太史  
曾題琢玉坊野屐蹋雲閒看竹  
春簾凝霧靜焚香別來又汎



松陵樵渺渺輕鷗江水長

馬治 五首

治字孝常一字元素宜興人初爲沙門洪武初由茂才舉授內邱知縣遷建昌同知有荆南倡和集海漁

集

沈敕荆溪外紀馬治爲詩文典雅沖澹善眞行書田按孝常好遊有勝具與周履道砥俱主宜興周氏好學有賢行爲屋澗東西以館之置茶具酒腕屬其子弟從之游窮陽羨溪山之勝隨事倡和積詩一帙題曰荆南倡和集履道詩情盡才超出流輩而孝常爲之亞所作俱清粹雅淡有古作者之意履道旋去遊吳與高季迪徐幼文結社已而張士誠據吳傾懷接士履道從軍會稽遂歿於事高季迪有得亡友周履道記室在繫所詩次韻云擬出且羅再卜鄰死生俄判兩吟身百年豈料逢今日四海何由見此人吳地有閨花已盡楚山無塚草空新一篇幽憤時時讀風雨寒燈夜獨親據此詩則履道在繫室因而

烈命今亦莫得而詳也徐幼文有題呂山人所藏荆南倡和集後詩云故友空悲生死異名州曾托亂離頻因君重讀荆南集已憶溪山又憶人末注云時履道歿於兵蓋亦約畧其詞未道其詳也倡和集爲履道手書與高季迪者季迪屬其鄉人呂志敏藏之成化間始附雕本履道盡有銅官山色爲世所珍錄孝常詩附見其事於此

### 牧之水榭

牧之信奇士縱橫兄當時著書亦有兵豈惟工賦詩畫船張水嬉禪榻悲鬢絲廣陵罷走馬陽羨亦解龜芳樹竟寂寞清溪自淪漪斯人向千載陳迹宛如茲

### 縱筆

多羅樹下昔徜徉塵世歸來已渺茫猶有狂吟三百首逢人大笑億千場西風雪氣紛紛白夜雨河流混混黃忽對青山

嗟歲晚知君縱筆興難忘

追和柯丹邱所藏坡翁詩帖 五首錄三

東閣小詩書夢破後堂殘醉燭花明春風客散茶香在寂寞  
人間萬古情

紅入雨顚春意滿翠籠雙袖曉寒尖雖知別後情難識也覺  
愁中醉易添

彩筆詩成舉座驚素衣新翦鳳毛翎多情應是蓮花女留得  
銀箏金字經

陶琛 一首

琛字彥珩長洲人洪武初以薦爲儒學官

皇甫汈長洲志彥珩有文學洪武初以薦爲儒學官  
志尙高潔工古篆書多得籀法

過邵弘道先生墓

青山隱隱遠相連  
仰睇松楸憶舊年  
芳草蓋墳長似帶  
碧苔封迳小於錢  
嵐氛晝掩微微雨  
野水春流淡淡煙  
澆遍壺漿平耆德  
潸然涕落誅文牋

董紀四首

紀字良史以字行更字述夫上海人洪武中舉賢良方正對策稱旨授江西按察僉事有西郊笑端集

四庫總目董紀詩平易樸實視袁凱諸人稍爲不逮故張汝弼作西郊笑端集序謂其漫爾而仕漫爾而歸詩文亦漫爾而作弗冀有傳頗致微詞而朱彝尊靜志居詩話則舉其題海屋詩過橋雲磬天台寺泊岸風帆日本船句謂亦不爲率漫然紀集明世未經再刻流播頗稀明史藝文志亦闕而不載彝尊明詩綜所錄但採之賴良大雅集中未及見其全帙故所摘佳句謹此今觀此集過質傷俚之弊誠所不免然其

合作往往得元白張王遺意汝弼以一格繩人不足  
以盡詩體彝尊執一二語以爭之亦未盡紀所長也  
書史會要董良史詩開整流利諸體俱可觀  
楊李詩集董良史詞翰俱佳與陸宅之吳子愚相頡  
頏列朝詩集董良史詞翰俱佳與陸宅之吳子愚相頡  
田按良史七言斷句風致翩翩殊有別趣

海屋爲壽古鼎賦

海上高僧屋數椽珊瑚碧樹繞堦前過橋雲磬天台寺泊岸  
風帆日本船龍女獻珠來供佛鯨人分席與衆禪百年劫數  
如彈指眼見桑田幾變遷

江行

江水悠悠江路長孤鴻曉月有微霜十年踪跡渾無定莫更  
逢人間故鄉

絕句

東風細雨溼窗紗  
日晏黃蜂未報衙  
芳草滿庭隨意綠  
時時吹落碧桃花

效秦文仲絕句

日上東華暖霧開  
御河金水碧於苔  
內廷擎出清涼繖  
知是黃門進膳來

明詩紀事卷二十

貴陽陳 田輯

甲籤

張適 二十二首

適字子宜長洲人洪武初以秀才舉擢工部郎中病免復以明經薦授廣西布政理問調雲南魚課大使考滿改宣課大使有甘白先生集十二卷

田按子宜與高季迪為素交不入北郭十子之列晚官滇南沐景暉滄海遺珠集亦不錄焉蓋名在顯晦之間者也詩有樂圃江館南湖江行滇池等集與文集合為十二卷明史藝文志僅稱子宜有樂圃集六卷四庫提要存目有甘白集六卷蓋均未見其全也余所得為翁覃溪顧千里舊藏本詩文皆具樂圃集多摹擬未化江館南湖以後特為俊爽集中有畫竹贈王生寫竹枝壽周南老等詩蓋嘗與陸天游倪

元鎮諸人遊故兼擅盤礴之長此亦紀明初畫家者  
所當知也

### 山居次韻

山深景更幽石磴滑難上春徂眾芳歇雨過百泉響松頭度  
笙鶴仙裾令人想境靜神自靈欲寡心遂養堆案多道書過  
門無俗鞅日暮揖歸僧松間抱琴往

### 南塘曲

堤柳絲絲烏哈哈曲塘草深沙路狹野港倦游頰尾魚蕪田  
欲闢青頭鴨東風過陌飄塵香冶遊年少紫絲韁花間不管  
羈人怨年年負春空斷腸

### 題唐人出游圖

白馬紫絲韁春風俠骨香昨朝圖雞社今日賭毬場醉歸斜



過青松下金張路逢皆下馬到門絃索候花前美人爭接黃  
金鞭

樂圃林館 十首錄三

何處是吾廬城西數畝餘坊存前哲號屋貯古人書已疾親  
栽藥供餐自灌蔬長年因謝俗戶外少來車

園池雖市邑幽僻絕塵緣水活元通港荷稀不礙船竹陰迷  
藥竈雨氣慢琴絃試檢床頭藥新來益幾篇

林密簾櫳暝門清樹石連合香乘雨霽壓酒及花前嗜古思  
先輩傷今話昔年何由清鬱抱春茗淪林泉

姑蘇志樂圃在清嘉坊北宋長文所居中有高閣清  
池喬松壽檜知州章帖表爲樂圃坊有達經堂華嚴  
庵招隱橋見山岡琴臺鶴室墨池筆溪及西圃草堂  
共二十景元末張適號甘白築室於上題曰樂圃林

館與高敢倪璘陳麟謝恭姚廣孝旌和爲十詠高敢  
詩林塢通幽閱山明雲出溪門無俗客至池有水禽  
嘯對酌山花下行吟野竹西石床春寂寂苔色映青  
藜開軒時野眺山色翠迢遙屏結霜中檜閣開雪裏  
蕉煖煙初扇圃野水微平橋曳杖閒來往時挑酒一  
瓢幽居無灑掃風景自俯然紅溼花間雨青分柳外  
煙山窗捫虱坐石榻枕書眠自得閒中趣栽花疊錦  
川陳麟詩桃花夾石林館宛似武陵溪醉後拋書枕夢  
同聞鳥嘯水光孤野外山色小橋西盡日無來客徐  
吟信杖藜見說林居好終朝無雜賓捲簾通紫燕投  
餌釣金鱗竹影雲連榻楊花雪點巾開池養鵝鳴不  
使惱比鄰謝恭詩故人非傲吏舊隱勝恩溪塵世人  
難到空林鳥自嘯青山懸榻下綠樹斷崖西終日無  
餘事長吟信杖藜  
田按姑蘇志第錄高季迪陳文昭謝元功詩余檢姚  
廣孝逃虛子集有題張山人適樂園林館詩附錄於  
此去官歸故里僑隱倚高林花月尊前友松風席上  
琴幽通西峽曲涼入北窗深此處堪清賞時來一解  
襟開牖依林樾迢迢去市遙翠低承雨竹綠碎受風  
蕉夕嶺還侵戶春流欲斷橋主人緣愛客時爲出山  
孤松桂閣林屋遙知處士家疏簾肯受月虛幌曉承  
霞素味園中木詩材樅外花尋幽須到此毋惜去程

除林居無俗韻琴史引來賓逕狹難容轍池深可縱  
鱗登山新製履瀉酒舊裁巾我亦耽幽者他年願托  
隣又倪雲林爲甘白作樂圃林居圖題句云暮投齋  
館靜城郭似幽林落月半林影涼風孤鶴音汀雲紫  
遠夢桐露溼青琴喧卑靜慮齋爽集沖積余來城  
郭而暑氣熾甚偶憩甘白先生樂圃林居不覺數日  
相與蔭茂樹臨清池誦藝文之象爰彈有虞之南風  
遂以永日成此一詩并寫小圖呈甘白以寓笑樂耳  
甲寅六月十五日倪瓚

村居

爲士愛溝壑從農力弗勝不才終困頓無夢欲驚騰病慙庭  
多竹衰憑杖一藤到門無雜客吟子與琴僧

過湘潭

鼓柁清湘曲煙生日欲哺吳歌商舶叟楚語水祠巫牛背棲  
鸕鷀林間喚鷓鴣沙汀丹已泊返照落平蕪

過西墅故人家

渡水復穿林幽居石徑深風生花嶼煖雲護竹房陰壓酒常年計逃名物外心琴樽終日燕蕭散豁冲襟

宿金井陽

舟行去郭三十里天向此中開畫圖屋上亂山爭接漢門前一水直通湖鳥迷嵐氣栖叢竹雁帶江雲下綠蕪爲謁百年清獻廟長松深處立斯須

與陸天游張南村諸公遊溪西華嚴庵

讀書只在松檜林不道春色孤村深鳩唳雲暝亂遊思花落水流驚客心過溪尋僧蘭若僻埽石坐我紗櫺陰杖藜舊路逐樵返落日已下湖西岑

祝過戴隱居草堂

艤棹垂楊日欲昏  
埽齋延客且清論  
園池繞屋無十畝  
桑柘成林自一村  
學禮已能傳世業  
抱琴終不過王門  
爲將詩稿窗前讀  
銀燭飛花到酒樽

董山人來白田爲寄高季迪詩賦此贈別

江樹雲花散復凝  
水禽爭語卽晨興  
正當送客南塘路  
更擬酬詩北郭朋  
渚柳風生煙縷縷  
漁磯潮落石層層  
荒村迎送還難免  
浪迹山深恨未能

過朱卿宅

斜日疏林獨杖過  
避人歸鳥拂煙蘿  
居瀕東海知潮候  
門對南湖解棹歌  
烏桕樹紅霜落早  
白蘋花老雁來多  
悲哉宋玉

空愁絕矯首秋風兩鬢皤

登柳州城樓

落日江城煙霧深  
宦遊每感歲華侵  
山川殊助登臨興  
雨露常存戀闕心  
一鳥遠嘯沿水樹  
衆峰齊露出雲岑  
衰年抱病天涯外  
目斷鄉關思莫任

爲獅子林僧題雜畫

林下雨欲來  
竹樹風先起  
僧定寂無聞  
栖禽自驚語

過顧使君新居

解印歸來雪滿顛  
草堂新構水西邊  
窗前更種蕭蕭竹  
聽雨清宵對鶴眠

題枇杷青鳥

草堂只在水西邊  
雨熟枇杷繞檻前  
青鳥飛來又飛去  
隔簾衝斷煮茶煙

王耕雲有詩寄愚庵師師析其句爲四絕余亦奉和

久約樵翁共結鄰  
青山如待早歸人  
屋西有箇茅亭子  
飽聽松風起澗濱

南塘泛舟

一百五日又清明  
江花冉冉鳥嚶嚶  
拂水柳條千萬縷  
東風不礙酒船行

題梅花道人所製竹枝贈江月軒主者

月上江齋夜未分  
鸞笙遙度隔林聞  
上人更寄青瑤塵  
時拂天壇五色雲

題畫贈王生

歲暮天寒多雪霜  
草木落萬山荒  
唯餘清獻寺前竹  
箇箇吟風學鳳凰

謝恭一首

恭字元功長洲人徵弟有懋庭集

田按張子宜稱元功詩文俊麗惜懋庭集不傳

題張甘白樂圃林館

門徑稀人迹  
幽居只自然  
泉聲三月雨  
柳色半春煙  
水鑑看鷗浴  
山窗見鹿眠  
題詩花墅夕  
明月滿晴川

潘仁四首

仁字子安和州人流寓沔陽

據地陽遺音

官夔州府同知



據明風雅有天遊集海天清嘯集

戴本孝慙陽遺音潘子安郡逸士也工詩好遊流寓  
河陽著有海天吟嘯集  
田按張子宜甘白集有送潘子安歸河陽序云河陽  
潘公為雲南右衛指揮其猶子子安自其鄉來省侍  
焉子安將家子讀書明理俊其才而豐於詩諷讀所  
為天游集春容乎短章優游乎長篇澹焉而慮清坦  
焉而氣平子宜此序稱子安為河陽人竹垞詩綜據  
湖海耆英集稱子安為和州人而未詳其字余檢李  
文侍所集黔甯集及雲南通志均有潘仁詩稱仁字  
子安和州人始知竹垞疑潘伯濟為子安字者未確  
而兩陽和州異貫得戴應阿子安流寓河陽之說而  
疑始釋子安明初詩流所至著聲黔甯集滇志所錄  
皆子安省侍潘公至滇時作也余合數家撰述詳定  
其官籍名字如此

獻西平侯詩

雄譽超當代奇勳邁昔賢畫圖麟閣上環珮鳳池前受鉞曾  
趨陞平蠻久鎮滇寸心懸日月雙鬢短風煙令肅霜威凜機

深斗運旋斷蛟秋試劍落鵲夜鳴弦  
海岱烽初舉關山捷又傳  
七擒功已大六出計猶玄  
螻蟻驚藏滅貔貅喜勝還  
戰袍明錦獸歸鐙響瓊鞭  
露溼松間旆花迎柳外韉  
衛容嚴虎豹冠影動貂蟬  
頗牧甯同伍蕭張敢並肩  
簪籌黃石略恩澤紫泥宣  
弓挂扶桑近戈同玉壘  
偏挽河新洗甲拓土舊開邊  
仁信敷荒域公勤入汗編  
願言歌盛美安得筆如椽

沐黔甯挽詩

大星一夜西南落萬里誰分聖主憂  
心到九泉昭日月名垂千古重山邱  
中原父老思辛祐絕塞羌夷哭武侯  
數澤書生懷德義清鉛滿掬淚難收

田按子安二詩見黔甯集黔甯王沐英內侍李文秀所輯錄也王鎮淇十一年功德在人歌咏不較其薨

遊太華

也遠遊詞客謫宦蠻鄉多以詩挽之者百年未盡安邊略一寸徒遺報國心則沅州劉有年句也玉門東望歸無日銅柱南開鎮有年將星夕向南荒隕仙馭秋乘北斗懸則慈溪桂慎句也諸葛渡瀘當五月昆明歸漢又千年惆悵侯門曳裾客此時瞻望思茫然則松陽王景彰句也子安中原父老一聯當推擅場  
天風吹鬢酒初醒太華峰頭且共登山色慣迎逃世客水聲常送渡溪僧定中龍去雲生鉢夢裏猿啼月在藤最愛石窗風雨過早涼先到讀書燈

泊滄浪

滄浪濯纓仍濯足我來敢遂惟濯心高歌孺子不可見遠放靈均何處尋斷岸早霜千樹錦孤村落月數家砧中洲未必無芳杜誰采幽香慰苦吟

鄉經 五首

經字仲誼仁和人元進士洪武初以事徙滇有玩齋稿

列朝詩集王原吉謝鄉仲義進士詩云釋褐平生友  
耶官辟屢辭詩見滄海遺珠其後曾入洪也  
田按沐景暉錄仲誼等二十一人之詩爲滄海遺珠  
譬諸謫仙夜郎之什東坡僧耳之篇六詔遷客琅頂  
振玉當時轉徙西南一隅者人才如此可想見明初  
詞客之盛矣

題顧定之墨竹

虎頭諸孫總痴絕老安不痴乃用拙憶在吳中寫墨君雪楮  
冰縑每飄撇妙處不減文湖州同時更有柯丹邱眼底只今  
無此客使我悵悵懷風流蒼梧想見斑竹活看畫忽焉憂思  
豁安得二老從之遊搔首涼風起天末

題蘆花散人小像

朔雲化石忽五彩石也能言泣真宰玉堂調笑辭金魚月冷  
西湖醉魂在風流憶爾承平時接離倒著驢倒騎仙遊何處  
驚墮影秋空冥冥如見之黃鶴飛鳴杳無迹西風滿地蘆花  
白玉龍吹斷不可招空掩畫圖三歎泣

題澄碧樓

燕入雨侵簾鷗棲月近檐白紵三泖曲青隱九峰尖夏簟風  
漪展春醪雪乳黏元龍憐遠客高卧想無嫌

春陪呂志學會彥魯劉仲原登虎邱賦呈居中長老

虎邱山前新築城虎邱寺裏斷人行梵僧自識灰千劫蜀魄  
時飄淚一聲漸少松杉圍翠堵無多桃李過清明向來游事

誇全盛會對春風咏太平

卷二

靜志居詩話虎邱詩集一卷王高士賓所錄吾鄉項  
氏萬卷樓藏書也中載仲誼是詩同時和者呂敏志  
學云山上樓臺山下城朱旗夾道少人行會朴彥魯  
云闔閭冢上見新城無復行人載酒行僧宿居中云  
公餘聯騎入山城老衲追陪得散行又周南老有至  
正丁酉督役城虎邱詩八首一云奉檄趨功城虎邱  
築城吳人亦鮮有知者予嘗泊舟山後見遺趾尙存  
田按呂志學諸人詩竹垞第舉其首聯今具錄於此  
志學詩云山上樓臺山下城朱旗夾道少人行春風  
寂寞鶯花夢落日悲涼鼓角聲古塚金精來變幻天  
池劍影墮空明老僧趺坐忘塵慮石溜河須恨不平  
彥魯詩云闔閭冢上見新城無復遊人戴酒行山雉  
聽經依塔影樹鴉爭食亂鐘聲劍池龍去泉空冽茶  
竈僧閒火獨明我欲投簪營小隱佛香終日祝昇平  
居中詩云公餘聯騎入山城老衲追隨得散行短簿  
祠前看竹色小吳軒上聽松聲來遊古苑春將暮歸  
去南樓月已明題偏新詩佳勝處定應商畧過天平  
又劉本原仲原詩云一春不到闔閭城花事闌珊卻  
此行苗佛閣深留塔影小吳軒靜度鶯聲松林月暗

山精泣石燈人稀燐火明野剎那知興廢事只將經  
卷了平生

題桂花十二紅便面

金粟枝頭十二紅何年飛向廣寒宮素娥只愛青鸞舞且近

瓊樓立晚風

朱絛 三首

絛字士林

田按士林詩見滄海遺珠未詳其里貫構李英華有  
朱琳詩琳字玉林號雨椿嘉興人當別是一人竹垞  
詩綜錄士林雨中過韶州一律誤作玉林詩特正其  
訛俾仍舊貫焉

過洛社留寄李耕隱

故人近住林之東相望草堂雲氣中舊時松竹想無恙暇日  
琴樽誰與同作賦應能繼潘岳隱耕元不讓龐公過門不入

非爲慢兩鬢塵埃愧轉蓬

雨中過韶州

船下韶瀧日欲晡四山雲起景模糊沙鷗衝雨頻來去汀樹  
迷煙半有無作客又驚三月暮思家其奈一身孤愁懷浩浩  
渾如醉獨倚篷窗聽鷓鴣

題淘金驛

淘金驛前春色多紅桃綠柳映清波江南獨客悲時序奈此  
東風淡宕何

逢昶

八首

昶字光古修武人有清華車軒方外等集

田按明初大河南北稱詩者宋西隱而外當推光古  
詩見沐景鵬滄海遺珠其舟下淮水云舟人有嚴程



知我歸朝客是曾通仕籍者其因何事至滇今不可  
考矣光古及於滇多以詩輓之者胡粹中云獨騎玄  
鶴上丹邱爲記鉤天白玉樓詩板刊成應自校草書  
零落有誰收可能覓酒府中去無復携筇寺裏遊欲  
寄東風一行淚蜀江不肯向西流僧機先云昨日來  
過我今朝去哭君那堪談笑際便作死生分曠達陶  
徵士蕭條鄭廣文猶憐埋骨處西北有孤雲玩此二  
詩是曾官校官而客於沐氏者余詳考各家選光古  
詩皆自滄海遺珠錄出其集當不可復得矣

### 德公院

脩然青蓮宇水遶山相向老僧不出門林下樂清曠今日有  
誰來題詩在竹上

### 使回沂州

穆陵關下路數騎復南歸雲氣來蒙羽人煙入海沂晚田禾  
刈盡霜葉樹凋稀家擬明朝到吟鞭可緩揮

晚宿王衡家

應役城中久何能得避喧登樓山遠縣出郭樹連村僧舍竹松院人家瓜菜園晚來投舊館童子笑開門

登浪穹縣護民寺

浪穹西阜寺獨眺有餘情落日秋山色西風古樹聲征衣憐舊弊客路喜新晴洗鉢焚香事誰能了此生

古淵房閑書和韻

禪房碧樹深坐久語幽禽葉隰日穿透林端雲過陰筆新微蘸墨驚故少生蟬僧有思鄉者時時亦起吟

月堂室中閑題

情心投靜室童子啟雲關秋色老蒼樹夕陽明在山高崖泉

落響遠漢鳥飛還擾擾紅塵裏無如僧最閑

江隄晚眺

江隄聊上適離情  
葭蕀無窮一望平  
遠樹天邊歸鳥沒  
孤村雨外夕陽明  
海門帆過衝秋色  
沙浦潮來作怒聲  
伫立南雲重回首  
依微尙見晉陵城

涉溪

晝涉溪方淺暮臨溪忽深水  
猶如此變安可測人心

楊子善  
三首

善字子善以字行天台人  
洪武初以明經授應天府  
治中遷沅州同知改平樂府知事  
坐事謫雲南卒於謫所

田按子善歿於滇張子宜爲作城誌備詳宦蹟始末  
稱子善由沅州同知改廣西平樂府知事咸學標三  
台詩錄謂任樂平知府誤矣子善以洪武丁卯謫滇  
居六年壬申卒實洪武二十五年也錢牧齋列朝詩  
錄入乙集論世亦未詳詩見滄海遺珠

過楊井山

霧盡寒初退風輕雨欲晴山田春飽水農舍早趨耕行李青  
霄近煙波白髮明正愁泥路滑林外竹鷄鳴

憶鄉中諸故友

東麓溪頭蟹渚陰故鄉幾度憶同襟詩聯石鼎秋燈冷韭莖  
春園夜雨深白髮每馳張敏夢青山懽鼓伯牙琴客床寥落  
情無賴月滿空梁強自吟

題畫蘭

九畹香清露氣寒三湘月落淚痕乾楚天空濶秋無際誰復  
行吟澤畔看

郭櫬 一首

櫬字德茂黃巖人洪武初以薦任饒陽知縣有暢軒  
稿

感秋

秋卉亂紅綠雜然不知名感此風露移故亦競敷榮亦有幽  
蘭花中含芳潔情晏然處明晦不以臭味矜奕奕保天和豈  
謂殊死生

葉見泰 二首

見泰字夷仲臨海人明初取台州召爲部從事使安

南興高唐州判轉睢甯知縣入爲刑部主事有蘭莊集

田按宋景濂序夷仲集云夷仲諸作溫醇而有典則飄逸而有思致其辭簡古而不麗其神豐腴而不瘠求諸輩行之中未見其敵蓋亦明初作者惜集不傳

滄浪漁者歌

雪消江水自天來江上桃花映水開釣得活魚須換酒白頭浪裏棹船同

雨晴斜日照漁蓑笑逐蓮舟入菱荷浦口月明風浪靜有人教唱竹枝歌

戴奎一首

奎字文祥黃巖人元末錢塘錄事明初徙濠以薦爲

齊河主簿有介軒集

成學標三台詩錄文祥經事前朝答弟文信詩云萬里與圖新入貢一時遺老復遷官祇緣舊國輕周鼎徒使仙人泣玉盤不忍忘元之心言下益顯

次台城寄故園

城南墟里舊盤旋此日相看倍黯然寄語門前五楊柳好留春色遲歸田

鄭元益一首

元益字西清黃巖人明初以言事授陽春知縣  
轉遷陽春晚宿惠州城外

十二嶺頭疏雨晴行人晚宿惠州城城中聞有東坡井水與人心一樣清